

## **Faulo ena leta vemagilafuna me Kolinita 'idia**

### *Leta ana alamani weaqina*

Faulo ena leta vemagilafuna tufwana me ena nuavita 'wayavia me Kolinita 'idia. To'ekalesia vaidi Faulo igivenuavitea, mana ivonaya be tauna ge Yaubada ena tovaletuyana aqiaqi. Ta wese tove'ita 'e'eu'au'avidu ilugu 'ekalesia nana 'inaya, e 'inega wese vona waiwaina neidi ma'oda ina vetumaqana 'aiqa. Tua ta wese ena qaiawa weaqidi 'wayavia 'idia, 'inega ba'e leta nana 'inaya edi veiana weaqina givesimatalia, ta wese vematamagilafuyedi ena vayausa 'idia weaqina. Ta wese Faulo venoqiedi nei kavovo ana a'u weaqina, mana ni'a iawafela be me Ielusalema ina iuledi edi toa vitana weaqina. Ta wese Faulo taunega ena toa vitana Ieisu Valena weaqina givesimatalia 'idia.

### **Leta gamona**

- 1:1-11 Vematamagilafu be lukaiwa ta wese venoqi
- 1:12-7:16 Faulo be Kolinita ana to'ekalesiyavo
- 8:1-9:15 Nei kavovo tovetumaqana di'we Iudia 'inaya weaqidi
- 10:1-13:10 Faulo ana veyoveyoya tovaletuyana 'idewani taunega vata'ita'iea
- 13:11-13 Vona 'ebelu'ovoa

### *Faulo ena lukaiwa*

<sup>1</sup> Leta ba'e ya'a Faulo ta wese taida Timoti 'imega. Lova Yaubada tauna ena nuenuega venua'ivinegu 'inega yavetovaletuyana Ieisu Keliso weaqina. Ima'a leta nana a'wayavia waiwai omi'a 'ekalesia 'abaga qiduana Kolinita 'inaya otoatoa, ta wese Yaubada ena tomotauyavo gwalagwalami di'we Akaya 'inaya otoatoa.

<sup>2</sup> Nuanuagu Tamada Yaubada be wese eda Kaiwabu Ieisu Keliso edi nuakolokolo be edi nuadaumwala ina neimi.

### *Yaubada ena iula 'idaya*

<sup>3</sup> \* Eda Kaiwabu Ieisu Keliso Tamana Yaubada kana awatuboya. Tamada Yaubada tauna nuakolokolo 'iuna, ta wese tauna ada Toiula aqiaqi.

<sup>4</sup> Tauna eda toa vitana qabudi 'idiega iuiuleda be 'inega ita'a wese ada fata edavo kana iuledi ba'e iula nana 'inega tuta nana taudi wese toa vitana ilobelobe.

<sup>5</sup> \* Ta ona alamani aqiaqiea 'eguma Keliso weaqina yuvaqa kalobelobe, e 'inega wese Yaubada iula qidua va'inena naneida Keliso 'inega.

<sup>6</sup> 'Inega tuta nana vita qiduana alobelobe, e 'inega nawale ana aqiaqina ta wese 'etoyavua Keliso 'inega ona lobe vita diavona 'idiega. Mana Yaubada ena iula 'imaya 'inega ama fata vona iula ana neimi. E ba'e 'inega omi'a ami fata vita diavona ona bibitaqodi 'idewani ima'a abibitaqodi.

<sup>7</sup> Omi'a be ima'a eda toa vitana 'aidegana kalobelobedi, 'inega ahalamani aqiaqiea omi'a wese

---

\* **1:3:** Lom 15:5      \* **1:5:** Same 34:19

iula nana 'aidegana ona lobe'a 'idewani ima'a alo-belobe'a Yaubada 'inega.

8\* Egwavo, nuanuagu be ona alamania lova vita qidua va'inena alobe'a tuta nana di'we Eisia 'inaya atoatoa. Ta vita diavona 'idiega avonaya be ge ama fata ana vewaiwai vai'nedi, ta 'esi kavonaya be ada 'aliga 'idiega.

9 Vonahaqiaqi, tuta goyona be ada 'aliga, ta ba'e toa vita nana 'ifoqe 'imaya yaqisa ge taumega ema waiwai ana vetumaqanei, ta 'esi Yaubada ena waiwai 'inaya ana vetumaqana, mana tauna ana fata be 'ali'aligidi nagiveya'itoto 'eviviedi.

10 \* Ta vonahaqiaqi, Yaubada 'etoyavuima veilage qidua otaqina 'inega. E 'inega ahalamani aqiaqiea wese tuta maimai 'idia 'idewani na'etoyavuima.

11 Ta omi'a ona iulema emi venoqi 'inega Yaubada 'inaya ima'a weaqima. E ba'e 'inega to-motau qabudi ina lukaiwa Yaubada 'inaya, mana ina alamani aqiaqiea Yaubada omi'a qabumi emi venoqiavo ni'a ve'iedi, e 'inega iula qiduana alobe'a.

*Faulo ena nuanua givilea ena vayasa weaqina*

12 Ima'a taumega agigivaneyema, mana ahalamani aqiaqiea ema ilivu be wese ema viaqayavo tomtau qabudi 'idia tunutunuqina Yaubada matanaya. Ta vonahaqiaqi, ema veiaiana omi'a maega tuta qabuna tunutunuqa otaqina ta ge wese ada u'avemi nage ada veilivu veifemi. Yani qabuna aviaqidi Yaubada ena

---

\* 1:8: Via 19:23; 1Kol 15:32      \* 1:10: 2Tim 4:18

nuakolokolo 'inega, ta gebu totoa bwa'obwa'o edi alamani 'inega.

13-14 \* Ema letayavo 'imia simasimatalidi ta vona diavona adi alamani meaqadi, 'inega ema 'wayavi qabuna ami fata be ona alamani aqi-aqiedi. Lova nuami ge da'eqa'uya ema viaqayavo vaidi weaqidi, ta ana 'ita wese ba'itagana nawale ge oda alamani aqiaqiema. Ta nuanuagu qid-uana nuami na'eqa'uya 'inega nawale Iesu ena 'evivi mai ana 'aubena 'inaya ona vonavane ima'a weaqima, 'idewani wese ima'a ana vonavane omi'a weaqimi 'aubena nana 'inaya.

15 Ba'e yani diavona yaveveqaevedi ni'a oalamanidi, 'inega yavonaya be eda wai eda vayausimi, mana nuanuagu be tuta magilafuna 'idia eda giveqaiawemi.

16 \* Mana lova egu tauya di'we Masidonia weaqina vonigo eda vayausimi tauya nana nuani-naya, ta wese yavonaya be eda vayausa 'eviviemi egu tauya di'we Iudia 'inaya. Ta ba'e vayausa nana 'idiega ami fata be oda iulegu egu 'eda weaqina. Ta ge eda wai.

17 'Inega nage taumiega ovetala'aiemi ovonaya, "Tola'ai weaqina Faulo ena nuanua givilea be 'inega ge damai sabi vayausima?" Nage ovonaya be taugu egu nuanua ge eda alamani aqiaqiei? Ta wese nage ovonaya be ya'a kavona bwa'obwa'o ana ilivu ana to'abiboda taha, mana bwa'obwa'o ana tomotauyavo iawafela be ivonaya, "Ao", ta edi nuenuega inoga be ivonaya, "Gebu."

---

\* **1:13-14:** 2Kol 5:12; Fil 2:16      \* **1:16:** 1Kol 16:5-6

18 Yaubada ena vona tuta qabuna vonahaqiaqi, ta ya'a wese egu vona qabuna vonahaqiaqi. 'Inega 'eguma ya'a ena vona "Ao", e 'inega vona nana wese vonahaqiaqi,

19 \* mana Yaubada Natuna Iesu Keliso ge taha tuta "Ao" da'inanea ta 'abibodanaya ena nuanua dagivilei be davonaya "Gebu." E ba'e Iesu nana weaqina ya'a Faulo, be Timoti ta wese Sailasa ni'a alugaihiea 'imia. Mana ba'e Iesu nana 'inaya vonahaqiaqi namo 'eno'eno.

20 \* Vonahaqiaqi, Yaubada ena vona fofofolayavo qabudi adi aqiaqi ni'a give'ifoqeyedi Natuna 'inega. Ta ba'e 'inega Keliso ana wawa 'inega kavonavonaya, "Ao, vonahaqiaqi, ema nuanua 'idewani!" tuta nana Yaubada kahawahawatuboya.

21 Kahalamani aqiaqiea omi'a be ima'a Yaubada ena nuanua 'inega ni'a kave'aidega Keliso maega, mana tauna ena nuanua 'inega venua'ivineda ena toмотауyavo 'idewani.

22 \* Ta Yaubada taunega ana 'ebe'inana ni'a a'uya giwalidaya, ta 'ebe'inana nana ana alamani Niboanina Gwalagwalana. Ta ba'e Niboani nana maduneida, 'inega kana alamani aqiaqiea be nawale wese yani qabuna aqiaqina naneida.

23 Yaubada giwaligu qabuna alamani aqiaqiea, ta wese alahalamania ya'a tuta qabuna yavonavona aqiaqi. 'Inega ena vematamagilafuyemi tola'ai weaqina ge eda vayausimi. 'Iuna mana ge nuanuagu lugwae waiwaina eda neimi.

---

\* 1:19: Via 18:5    \* 1:20: Ve 3:14    \* 1:22: Efe 1:13-14; 2Kol 5:5

24 \* Ima'a ge nuanuama be ana luviniemi emi vetumaqana weaqina ma'oda ona vefewa 'aipei, mana ni'a ahalamania omi'a emi vetumaqana 'inega otovolo'i'ita. Ta 'esi nuanuama omi'a maega kana fewa 'aidega, 'inega qaiawa qiduana ona lobe.

## 2

1 \* 'Inega tauguyega yavonaya, "Ana 'ita ge ena tauya me Kolinita 'idia sabi vayasa 'eviviedi, mana ge nuanuagu wese ena givenuavitedi."

2 Mana 'eguma ya'a egu vayasa 'inega eda givenuavitemi, e 'inega omi'a ge ami fata be oda giveqaiawegu, waisa?

3 Lova egu leta 'inaya me egu nuavita ta wese ma mataelugu vona waiwaina yaneimi. Ta egu leta 'iuna, mana ge nuagu tauguyega eda wai be oda givenuavitegu egu vona waiwaina 'imia weaqina, mana omi'a luaqiaqiemibe ona giveqaiawegu. Ta yahalamani aqiaqiea 'eguma ya'a me egu qaiawa qiduana, e 'inega omi'a wese oqaiqaiawa.

4 \* Vonahaqiaqi, me egu nuavita ta wese me egu dou lova leta nana ya'wayavia 'imia. Ta leta nana ge eda 'wayavi sabi givenuavitami, ta 'esi nuanuagu ona alamania ya'a yaveveyolubemi qiduana.

### *Taha 'oloto ena luveifana ana nuataqo weaqina*

5 Lova taha 'oloto emi 'ekalesia gamonega luveifana viaqia. Ta yavona aqiaqiemibe 'oloto nana ena viaqa veifa 'inega qabumi givenuavitemi, ta wese ya'a tufwana lutonova nana 'ewegu.

---

\* 1:24: 1Fit 5:3    \* 2:1: 1Kol 4:21    \* 2:4: Via 20:31

6 Ta 'eala 'imiega emi nuanua 'aideganega ove'aidega ana luvine weaqina. Ta wese luvine nana ni'a ogive'ifoqeyea 'inaya, e 'inega yavonemi, ta'iwa, ge wese ona luvematasabu 'eviviei.

7 Ta 'esi ba'itagana ona nuataqoya ta wese ona vona iulea, mana 'eguma ge ona 'ewa 'eviviei 'ekalesia gamonaya nawale nanuavita qiduana 'inega ge ana fata be naveaqaiaqi 'evivi.

8 'Inega nuanuagu qiduana emi veyoluba qiduana ona ve'ita aqiaqiea 'oloto nana 'inaya.

9 Vonahaqiaqi, lova leta nana 'inaya yavonemi 'oloto nana ana luvematasabu weaqina. Ta vona nana 'inega tufwana yasitonovimi, mana nuanuagu ena alamani aqiaqiea 'eguma egu vona qabuna nawale omatamatayagedi.

10 'Inega 'eguma omi'a ena luveifana weaqina ona nuataqoya, e 'inega ya'a wese ena nuataqoya. Vonahaqiaqi, 'oloto nana luveifa nana wese viaqia 'iguya, ta ya'a wese ni'a yanuataqoya. Ta wese Keliso ni'a alamania ya'a 'oloto nana ni'a yanuataqoya. Ba'e 'idewani yaviaqia omi'a ami iula weaqina,

11 \* mana 'eguma nuataqo ilivuna ge nuada kada viaqi 'ekalesia gamonaya, e 'inega nawale Seitani nalugu gamonaya, ta vita nana nakafia ta nagiveqiduea. Vonahaqiaqi, Seitani ena nuanua govaqa luveifadi weaqida ni'a kahalamania.

*Faulo ena simana ena toa kukusana 'abaga Tiloasi 'inaya weaqina*

12 \* Lova egu luvivila 'inaya Keliso Valena sabi

---

\* 2:11: Lk 22:31      \* 2:12: Via 14:27; 1Kol 16:9

lugaihina ya'ifoqe 'abaga Tiloasi 'inaya. Ta omo'e 'inaya eda Kaiwabu 'awa siwa'ea Vale nana ana lugaihi weaqina.

13\* Ta ya'a gebu me egu nuadaumwala eda toa-toa, mana 'abaga nana 'inaya taida Taitusi ge eda lobei. 'Inega me Tiloasi yalukafoiedi ta yatutuvila yatauya di'we Masidonia weaqina iada nana sabi salina.

*Yaubada ena tovaletuyanayavo givewaiwaiedi*

14 Alulukaiwa Yaubada 'inaya, mana ema ve'aidega Keliso maega Yaubada tuta qabuna vavanugwetema ta gigivewaiwaiema Valena ana vedavi weaqina. Ta Keliso nana 'inega ema viaqayavo qabudi 'idia avewaiwai. Ta ma'inaya atautauya Yaubada vevefewema eda Kaiwabu Valena Aqiaqina ana yawala dadana weaqina, 'inega Vale nana kavona kemwata meilana aqiaqina tomotau ida yaoyaoqia.

15-16\* Tomotau vaidi 'etoyavua ana 'eda 'inaya itautauya, ta wese vaidi veilaqe vataya ana 'eda 'inaya itautauya. Ima'a Keliso weaqina alulugaihi tomotau matadia, 'inega yawaima kavona bunama meilana aqiaqi otaqina ta Keliso vevegeubayea Yaubada 'inaya. E ba'e 'inega ima'a kavona bunama meilana aqiaqi otaqina tomeqabu Vale nana i'awahaqiaqiea 'idia. Ta tomeqabu Vale nana inogenogea, e taudi 'idia ima'a kavona 'uluma meilana 'idewani. Vonahaqiaqi, 'eguma kana nuaia ge taha toga ana fata be lugaihi ana fewa naviaqa aqiaqiei, mana fewa vita otaqina.

---

\* 2:13: Via 20:1      \* 2:15-16: Lk 2:34; 2Kol 3:5-6



17 Tomotau 'eala Yaubada ena vona ilulugaihiea, ta edi lugaihi 'iuna ge tomotau adi 'etoyavua weaqina, ta 'esi nuanuadi mane ina lobealugaihi nana 'inega. Ta ima'a ema ilivu gebu tou'ava diavona 'idewani, mana Yaubada ena vona alulugaihiea tomotau adi 'etoyavua weaqina, ta ge taha mali 'iuna weaqina. Ima'a ni'a ave'aidega Keliso maega, e 'inega yani qabuna aviaviaqidi ama Toluvetune Yaubada matanaya.

### 3

1 \* Nage egu vona diavona adi noqola kavona ima'a tovaletuyana taumega ada gigivaneyema? Ta gebu! Vonahaqiaqi, omi'a nuanuami vaidi tomotau leta ina miedi 'imia emi 'ebe'awahaqiaqi 'idia weaqina, ta wese nuanuami omi'a vaidi tomotau edi leta ona 'wayavidi edi 'ebe'awahaqiaqi weaqina. Ta ima'a tovaletuyana ge daluaqiaqiema be taha leta ana neimi emi 'ebe'awahaqiaqi 'imaya weaqina.

2 \* Ta 'esi omi'a tovetumaqana taumina kavona ema leta 'waya'wayavina giwalimaya, mana me Kolinita qabudi i'ite'itemi, e 'inega ema fewa aqiaqina nuanimia ialamani aqiaqiea.

3 \* Vonahaqiaqi, omi'a taumiega oveve'itayemi kavona taha leta 'waya'wayavina Keliso 'inega, ta ima'a a'iva'ava'aia. Ta ba'e 'wayavi nana ge da'ifoqe 'ebe'wayavi 'inega, ta 'esi Yaubada mayawaina Niboanina 'inega. Ta wese 'wayavi nana ge da'ifoqe dabo beabeana 'inaya, ta 'esi tomotau giwalidia.

---

\* 3:1: 2Kol 5:12; Via 18:27      \* 3:2: 1Kol 9:2      \* 3:3: 'Ifo 24:12; Iel 31:33; Isi 36:26-27

<sup>4</sup> Yani qabuna weaqina ni'a avonemi, ta ahala-  
mani aqiaqiea vona diavona vonahaqiaqi, mana  
ema vetumaqana qiduana ni'a aha'uya Yaubada  
'inaya Keliso ena viaqayavo 'idiega.

<sup>5</sup> Ta ima'a ge ada vonavona vonigo tauma ema  
waiwai 'inega yani 'eno'eno vatayadi ada viaqidi.  
Ta vonahaqiaqi, yani diavona aviaviaqidi, mana  
ema waiwai Yaubada 'inega a'ewe'ewea.

<sup>6</sup> \* Tauna ena nuenuega givewaiwaiema be  
'inega ama fata ana vetofewa ena luvine vau-  
vauna weaqina tomotau 'idia. Ba'e luvine nana  
gebu Mosese ena luvine 'waya'wayavidi 'idewani,  
ta 'esi Yaubada Niboanina 'inega. Mana lu-  
vine nugwenugweina ana 'ebeluo'ova 'aliga, ta  
'esi Yaubada yawai vataya ni'a neida Niboanina  
'inega ena luvine vauvauna 'inaya.

*Luvine vauvauna ena simatala waiwai otaqina*

<sup>7</sup> \* Luvine nugwenugweina ana luvineavo  
Yaubada 'wayavidi dabo beabeadu 'idia. Ta  
omo'e luvine nana 'inega tomotau 'aliga ilobea.  
Vonahaqiaqi, tuta nana Mosese luvine diavona  
'ewedi, e 'inega simatala waiwaina 'ifoqe 'inaya.  
Ta me Isileli ge adi fata be Mosese 'iawana ina  
'itei, mana Yaubada ena simatala waiwaina  
Mosese 'iawana 'afwalia. Tuta goyona 'inaya be  
simatala nana nahawala, ta tua me Isileli nawale  
'iawana ge adi fata be ina 'itei.

<sup>8</sup> E ba'e 'inega kana alamani aqiaqiea tuta nana  
Niboana Gwalagwalana yawai vataya luvine vau-  
vauna 'inega neineida, e 'inega wese simatala wai-  
wai otaqina 'ifo'ifoqe.

---

\* **3:6:** Iel 31:31; 1Kol 11:25; Ion 6:63      \* **3:7:** 'Ifo 34:29

9 \* 'Eguma luvine nugwenugweina simasimatalina, ta tua 'aliga miea. E 'inega kana alamani aqiaqiea luvine vauvauna ena simatala simasimatala otaqina, mana ba'e luvine nana 'inega ni'a kavetunutunuqa Yaubada matanaya.

10 Vonahaqiaqi, 'eguma luvine magilafudina edi simatala kana giveleleqedi 'inega kana alamania luvine nugwenugweina ena simatala ge 'idewani luvine vauvauna ena simatala, mana luvine vauvauna ena simatala simasimatala otaqina.

11 'Eguma luvine nugwenugweina simasimatalina, ta tua Yaubada a'usi'iea mana awahawalina, e 'inega kana alamani aqiaqiea luvine vauvauna ena simatala simasimatala otaqina, mana tauna ge ena awalamo.

12 Luvine vauvauna ena simatala na'eno vataya, 'inega me ema giwalifatu Yaubada ena vona alulugaihiea.

13 \* Ima'a ge Mosese 'idewani, mana tuta nana luvine 'ewedi 'inega 'iawana simatala, ta taunega 'iawana 'afwalia be yaqisa me Isileli ge adi fata be simatala nana ena vegoyo ina 'itei.

14 Ta me Isileli nuadi 'eluatufa, ta wese ba'itagana 'idewani tuta nana luvine nugwenugweina iavoavoya. Kavona be 'afwala nana nuadi da'afwali 'inega nuadi nawale ge da'eqa'uya ta ge adi fata be Yaubada ena vonahaqiaqi ina alamania. Ta ba'e 'afwala nana ge taunega ana fata be na'ewa yavulei, ta 'esi vetumaqana Keliso namo 'inaya 'inega ana fata na'ewa yavulea.

---

\* 3:9: Luve 27:26; Lom 1:17      \* 3:13: 'Ifo 34:33

15 Vonahaqiaqi, ba'itagana wese 'idewani tuta nana Mosese ena 'wayaviavo iavoavoya, 'inega kavona 'afwala nana giwalidi nawale 'afwa'afwalia, 'inega nuadi nawale ge da'eqa'uya.

16 \* Ta 'eguma taha toga nanuagivila be eda Kaiwabu navetumaqanea, e 'inega Yaubada 'afwala nana na'ewa yavulea.

17 \* Vonahaqiaqi, eda Kaiwabu tauna Niboana, ta ma'inaya Kaiwabu Niboanina toatoa, e omo'e 'inaya wese toa yavuyavuina 'eno'eno.

18 'Inega ita'a tovetumaqana qabuda 'afwala nana ni'a awala 'idega, 'inega eda Kaiwabu ena simatala aqiaqi otaqina ni'a ka'itea ta wese kahalamani aqiaqiea. Niboana Gwalagwalana 'idaya toatoa, ta tuta qabuna gigive'evaunida be yaqisa eda Kaiwabu ena simatala 'inega ita'a wese kana simatala, ta ba'e simatala nana tuta qabuna naveve'ena'i 'imia.

## 4

### *Yani kaikaiwabuna 'ulena gamonaya*

1 Yaubada ena nuakolokolo 'inega ba'e fewa nana neima, e 'inega ge wese ada lua'u fewa nana ana viaqa weaqina.

2 \* Ta 'esi ima'a viaqa 'wai'waividi be 'ebeiniyauyau adi viaqa ni'a anogedi. Ta wese tomotau ge ada u'avedi ema fewa 'inega, ta ge taha tuta Yaubada ena vona ada givedumedumea. Yaubada ni'a alamania ima'a ema vona tomotau 'idia tuta qabuna vonahaqiaqi. E ba'e 'inega

---

\* 3:16: 'Ifo 34:34 \* 3:17: Ion 8:36; Lom 8:2 \* 4:2: 2Kol 2:17; 1Te 2:5

tomotau ina alamani aqiaqiea ima'a ma ama vetumaqana.

<sup>3</sup> Vaidi tomotau ivonaya be Vale nana alulugaihiea 'idia 'wai'waivina ta ana alamani vitana. Ta 'eguma taha toga ba'e 'idewani nuanua 'aiqa, e 'inega tauna kavona luluve'waivina ta 'aliga ana 'eda 'inaya tautauya.

<sup>4</sup> \* Seitani tauna bwa'obwa'o ana yaubada luveifana, ta tomeqabu ge ida vetumaqana nuadi 'egiveatufidi, 'inega ge adi fata be Vale simasimatalina ena simatala ina 'itei. Ta ba'e Vale nana ena simatala tauna Keliso ena simatala qiduana simasimatalina. Ta Keliso nana tauna Yaubada ana ma'ama'ayau.

<sup>5</sup> 'Inega ima'a ge taumega weaqima ada lulu-gaihi, ta 'esi Ieisu Keliso weaqina alulugaihiea tomotau 'idia, ta avonevonededi vonigo tauna Kaiwabu. Ta wese avonevonededi ima'a avetofewa 'imia, ta ema vetofewa 'iuna, mana Keliso yani aqiaqi otaqidi maduviaqia 'imaya.

<sup>6</sup> \* Lova Yaubada vonaya, "Simatala, velovelovana qiduana gamonega una simatala!" Ta Yaubada ba'e simatala nana a'uya giwalidaya 'inega nuada giga'uya, ta ba'e 'inega ni'a kalamania Yaubada ena simatala aqiaqi otaqina kana 'itea Ieisu Keliso 'iawana 'inaya.

<sup>7</sup> \* Ba'e yani nana ni'a aveqaeyea 'imia yani aqiaqi otaqina weaqima, kavona yani kaikaiwabuna. Ta ba'e kaikaiwabu nana 'eno'eno 'ulena gamonaya. Ta ba'e 'ulena nana ima'a weaqima vonavona.

---

\* **4:4:** Efe 2:2; Kol 1:15; Ibe 1:3

\* **4:6:** Nug 1:3; Ais 9:2; 2Kol 3:18

\* **4:7:** 2Kol 5:1

Ta ba'e 'inega tomotau ina alamanian ima'a ema waiwai ge 'imega da'ifoqe, ta 'esi Yaubada 'inega.

8\* Ima'a tuta qabuna vita taha taha alobelobedi, ta vita diavona ge adi fata be ina givebe'uyema. Ta wese vaina tuta nuama voqana ma'oda ana viaqa 'aiqa ema fewa 'inaya, ta tua Yaubada ena fewa ge ada lua'uya.

9 Keliso ana aviayavo tuta qabuna ivevevoalanema, ta Yaubada ge taha tuta danogema. Ta wese ivunuvunuqa veiveifema, ta ge adi fata ina luve'aligima.

10\* Ba'e vita diavona 'idiega Ieisu ena veilage visiqina ima'a wese 'wafima 'inaya avevebaea tauna 'idewani, e ba'e 'inega Ieisu ena toa ma'ama'ayauna tomotau adi fata ina 'itea 'imega. Ima'a vita diavona abibitaqodi, mana nuanuama Ieisu yawaina ana ve'ita 'ifoqeyea tomotau 'idia.

11\* Vonahaqiaqi, tuta qabuna 'aliga vadi'wedi'wema ema vetofewa Ieisu 'inaya weaqina. E ba'e 'inega Ieisu yawaina be ena toa tomotau ina 'itea 'wafima dawalilidi be 'ali'aligidi 'idiega.

12 Egwavo, vonahaqiaqi, ima'a a'ali'aliga 'waqi, ta ba'e 'inega omi'a yawai vataya ni'a olobea.

13\* Ima'a tuta qabuna alulugaihi, ta ema vetumaqana 'idewani Same ana to'wayavi ena vetumaqana, ta tauna vonaya, "Ya'a Yaubada yavetumaqanea, 'inegana yasimasimana."

14\* Lova Yaubada eda Kaiwabu Ieisu giveya'itotoya 'aligega, ta ni'a ahalamani

\* 4:8: 2Kol 1:8; 7:5

\* 4:10: 1Kol 15:31

\* 4:11: Lom 8:36

\* 4:13: Same 116:10

\* 4:14: 1Kol 6:14

aqiaqiea ba'e Yaubada nana ima'a omi'a maega wese nagiveya'itoto 'evivieda 'aligega, 'inega na'ebe'eweda natauyeda Ieisu 'iawanaya.

15 Ta ba'e vita diavona alobelobedi abibitaqodi omi'a emi veaqiaqi weaqina, be yaqisa tomotau qabudi Yaubada ena nuakolokolo ina alamani aqiaqiea. Ta ba'e 'inega tomotau diavona ina lukaiwa Yaubada 'inaya, ta wese ana awatubo 'idiega nave'ena'i.

16 \* 'Inega ema fewa Keliso weaqina ge ada lua'uya. Vonahaqiaqi, vita diavona 'wafima tuta qabuna gigivedawalilidi, ta 'esi 'aubena 'aidega 'aidega 'idia avevevauvau niboanima 'inaya.

17 \* 'Eguma eda toa vitana kana giveleleqea tuta maimai maega, e 'inega kavona vita diavona ba'idia bwa'obwa'oya yani goyona, mana nawale tuta maimai 'idia ba'e vita diavona 'idiega kana lugu di'we 'ebeqaiawa vataya 'inaya.

18 \* 'Inega vita diavona ba'itagana kalobelobedi ge ada nuanua qiduana weaqidi, ta 'esi alulu'ita vane yani 'eno'eno vatayadi ge adi 'itamo weaqidi. Mana vita diavona ba'itagana kalulutonovidi tuta goyona ina awala, ta 'esi tuta maimai 'inaya qa-iawa vataya ge ena awalamo kana lobe.

## 5

### *'Wafi vauvauna weaqina*

1 \* Ita'a ba'idia bwa'obwa'oya katoatoa ma 'wafida, ta 'wafi diavona kavona didi. 'Inega 'aliga ana tuta 'inaya 'wafida ina awala, ta nawale tuta

---

\* 4:16: Efe 3:16    \* 4:17: Lom 8:17-18    \* 4:18: Kol 1:16    \* 5:1: 2Kol 4:7

maimai mahala 'inaya vanue vauvauna 'inaya kana toa. Ta vanue nana tauna 'wafida 'eno'eno vatayana ge tomotau nimadiege ida viaqi, ta 'esi Yaubada taunega 'iva'ava'aia weaqida.

<sup>2</sup>\* Ta eda didi diavona weaqidi kavesiniqaiqai, 'inega kalulu'ita vane eda vanue 'eno'eno vatayana mahalaya weaqina.

<sup>3</sup> Ba'e vanue diavona 'idiega Yaubada naveaqeda. 'Inega ita'a niboanida ge wese 'wafi gegana natoatoa mahalaya.

<sup>4</sup> Tuta nana ba'idia bwa'obwa'oya katoatoa 'inega kavesiniqaiqai 'wafida 'ali'aligidi weaqidi. Ta ge nuanuada kana 'aliga be kana ve'wafi geqa, ta 'esi vesiniqaiqai nana 'iuna mana nuanuada 'wafi vauvauna 'inaya kana lugu, e 'inega 'wafida 'ali'aligidi kana nogedi 'wafi 'eno'eno vatayadi adi 'ewa weaqina.

<sup>5</sup> Vonahaqiaqi, Yaubada taunega ni'a 'iva'ava'aida ba'e vea'ugivila nana weaqina. Ta ma'oda 'inega kana alamani aqiaqiei ba'e yani nana na'ifoqe 'idaya? Egwavo, kana alamani aqiaqiea mana Yaubada Niboana Gwalagwalana maduneida. Ta 'eguma Niboanina ni'a neida, e 'inega nawale wese 'wafi vauvauna naneida.

<sup>6</sup>\* Vonahaqiaqi, ita'a bwa'obwa'o 'wafina 'inaya katoatoa, 'inega wese katoa luluvai eda Kaiwabu 'inega ta ge kada 'itea.

<sup>7</sup> 'Inega 'ita ge yani qiduana 'idaya, ta 'esi vetumaqana yani qiduana 'idaya eda toatoa bwa'obwa'oya weaqina.

<sup>8</sup>\* Vonahaqiaqi, ni'a kahalamani aqiaqiea tuta

---

\* 5:2: Lom 8:23      \* 5:6: Ibe 11:13-16      \* 5:8: Fil 1:23



maimai 'inaya 'wafi vauvauna kana 'ewedi, 'inega nuanuada qiduana be bwa'obwa'o 'wafinavo 'idiega kana dena, mana 'eguma ba'e 'wafi nana kana nogea, e 'inega kana toa eda Kaiwabu maega ena 'abaga 'inaya.

9 \* Ta ge taha tola'ai 'eguma ba'idia bwa'obwa'oya katoatoa, nage 'wafi vauvauna ni'a ka'ewea be mahalaya katoatoa eda Kaiwabu maega. Ta 'esi yani qiduana tuta qabuna tauna kana giveqaiawea,

10 \* mana qabuda nawale kana tovololo Keliso matanaya be naluvineda. 'Inega ita'a 'aidega 'aidega luvine kana 'ewea bwa'obwa'o 'wafina ana viaqa 'inega. E 'inega nave'ieda eda viaqa aqiaqidi weaqidi, ta wese eda viaqa luveifana weaqidi.

*Tomotau kana miedi Yaubada 'inaya be maega ina veiana 'evivi*

11 Ima'a Kaiwabu a'amayabea, 'inega avevetafe'wa waiwai tomotau nuadi sabi givilana be ina vetumaqanea. Yaubada giwalima be wese ema nuanua qabuna alamani aqiaqiedi, ta yanuaia omi'a wese giwalimiega oalamani aqiaqiema.

12 Ge nuanuama be taumega ana givaneqema, ta 'esi nuanuama omi'a ona vonavane weaqima be yaqisa ami fata tomeqabu ivonavane bwa'obwa'o ana alamani weaqina ona ve'iedi. Ba'e tomotau diavona ivonavona vane tomotau adi 'ita weaqina, ta ge ida nuanua tola'ai 'eno'eno tomotau giwalidia.

\* 5:9: Kol 1:10; 1Te 4:1 \* 5:10: Tolug 12:14

13 Vaidi tomotau ivonaya be ima'a tovekwavak-wava. Ta ge ada nuanua qiduana edi 'awaluveifa weaqina, mana yani qabuna aviaviaqidi e ba'e Yaubada weaqina aviaqia. Ta 'eguma ima'a ge kwavakwavama, e 'inega omi'a ami iula weaqina.

14 Keliso ena veyoluba qiduana tomotau weaqida nuama 'ewea, ta ba'e veyoluba nana 'abi'abiluvinema. Mana ni'a ahalamania tauna ana 'aidega tomotau qabuda weaqida 'aliga, 'inega ita'a qabuda wese kavona kada 'aliga tauna maega.

15 \* Vonahaqiaqi, tauna tomotau qabuda weaqida 'aliga be yaqisa tomeqabu yawai vauvauna i'ewe'ewea ge taudi adi giveqaiawa weaqina ina toatoa, ta 'esi edi toa 'inaya Keliso ina giveqaiawea, mana Keliso nana 'aliga, ta 'abibodanaya wese Yaubada giveya'itoto 'eviviea weaqidi.

16 Lova tuta nana Keliso nawale ge eda vetumaqanei 'inega yavonaya be tauna tomotau kavokavovo kavona totoa bwa'obwa'o taha 'idewani. Ta ba'itagana ge wese 'idewani eda nuanua 'aiqa Keliso weaqina. 'Inega ba'itagana ge wese 'idewani ada nuanua 'aiqa tomotau weaqidi kavona totoa bwa'obwa'o inuanua 'aiqa tomotau weaqidi.

17 \* 'Inega 'eguma taha toga Keliso maega ni'a ive'aidega, e 'inega tomotau nana ni'a vevauvau 'evivi. Tauna ena toa nugwenugweidi ni'a awala, ta 'esi ilivu vauvauna be wese nuanua vauvauna ni'a i'ifoqe 'inaya.

---

\* 5:15: Lom 14:7-8      \* 5:17: Lom 8:1; Gal 6:15

18 \* Ba'e vevauvau nana Yaubada 'inega 'ifoqe. Tauna veiana 'evivieda Keliso ena viaqa 'inega. Ta 'inega taha fewa Yaubada ni'a neima, ta fewa nana ana alamani ba'e: Tomotau ana miedi 'inaya be maega ina veiaiana 'evivi.

19 \* Mana Yaubada Keliso ena viaqa 'inega totoa bwa'obwa'o qabuda veiana 'evivieda tauna maega. 'Inega ba'itagana eda luveifana qabuna Yaubada ge wese danuave'avinidi, ta 'esi ni'a nuataqodi. Ta Yaubada venua'ivinema be veiaiana 'evivi Valena ana lugaihiea tomotau 'idia.

20 Ima'a avetosimana Keliso weaqina, kavona be Yaubada taunega 'imega davonavona tomotau 'imia. 'Inega Keliso ana wawa 'inega avevenoqiemi omi'a Yaubada maega ona veiaiana 'evivi!

21 \* Vonahaqiaqi, Keliso ge taha tuta luveifana daviaqia. Ta tua Yaubada Keliso nana ve'ewea kavona toluveifana taha 'idewani, e 'inega 'aliga lobeia ita'a eda luveifana weaqidi. Ta Keliso nana ena viaqa nana 'inega ni'a kavetunutunuqa Yaubada matanaya.

## 6

1 Ima'a afewafewa Yaubada maega, 'inega avevenoqiemi waiwaina Yaubada ena nuakolokolo valena ge ona nogei.

2 \* Mana Yaubada Buki Nugwenugweina 'inaya vonaya,

“Egu wai sabi nuakolokolomi weaqina  
ana tuta tauguyega yavenua'ivinea,  
ta 'aubena nana 'inaya emi noqi yanoqolia.

\* 5:18: Lom 5:10 \* 5:19: Lom 3:23-25 \* 5:21: Ibe 4:15 \* 6:2: Ais 49:8

Ta wese 'aubeni nana 'inaya yawai ta yaiulemi ami  
'etoyavua weaqina."

Vonahaqiaqi, ba'itagana Yaubada nuanuana  
naiulemi, mana ba'itagana 'etoyavua ana  
'aubena!

*Faulo vita taha taha lobedi*

<sup>3</sup> Ima'a tovaletuyana taumega a'itamaki aqi-  
aqiema luveifana 'idiega ema toa be wese ema  
fewa 'idia. Mana ge nuanuama tomotau ina ve-  
talabudabuda weaqima ta ina vonaya, "Ana 'ita  
Faulo 'elavidi taudi gebu Ieisu ena tovaletuyana  
aqiaqi, mana edi ilivu luveifana weaqina ni'a  
kanoqolia."

<sup>4</sup> Vonahaqiaqi, ge aqiaqina 'eguma tomotau ina  
venuana magilafu ema viaqayavo weaqidi. Ta  
'esi nuanuama qiduana tomotau ina 'itema ta ina  
'awahaqiaqiema ima'a vonahaqiaqi Yaubada ena  
tofewayavo. 'Inega vita be, vevoalana ta wese  
nuavita qabudi abibitaqodi.

<sup>5</sup> \* Ta vita diavona adi alamani ba'e: To-  
motau ivunuvunuqima be, vanue 'ebeyoqona  
'inaya ia'ua'uluguyema be, togamosoala qabudi  
ivevevoalanema. Ta wese ema fewa qiduana  
'inega tuta goyona be ada tafefwai be, ge ada 'eno  
aqiaqi ta wese ma botanima.

<sup>6</sup> \* Ima'a Yaubada ni'a 'awahaqiaqiema  
ema ilivu vunavunaqidi 'idiega, be wese  
'awahaqiaqiema ema alamani Keliso Valena  
Aqiaqina weaqina. Ima'a voalamavo edi ilivu  
luveifana 'imaya 'idiega abibitaqoma, ta wese  
tomotau qabudi anuakolokoloyedi. Ima'a

---

\* 6:5: 2Kol 11:23-27 \* 6:6: 1Tim 4:12

tuta qabuna Niboana Gwalagwalana ena iula 'inega afewafewa, ta wese tomotau qabudi aveveyolubedi.

<sup>7</sup> Ta wese me ema gwavubiga vonahaqiaqi alu-lugaihiea. Ta tuta qabuna Yaubada ena waiwai 'inega afewafewa. Ima'a ema 'ebeluavia ema ilivu tunutunuqina, ta ilivu diavona 'idiega voalamavo atalatala'avudi ta wese 'idiega avabodebodema.

<sup>8</sup> Ima'a tuta qabuna Yaubada weaqina afewafewa. Ta ge taha tola'ai 'eguma tomotau ina awatuboma nage ina 'awaluveifema, tua ta Yaubada weaqina afewafewa. Ta wese ge taha tola'ai 'eguma ina vegilema nage ina 'awahaqiaqiema. Ima'a tuta qabuna avonavona aqiaqi, ta taudi ivonaya be ima'a to'eu'au'ava.

<sup>9</sup> \* Tomotau ni'a ialamani aqiaqiema, ta tua iveilivuyema kavona be ge ida alamanima. Ima'a 'aliga di'wenaya atoatoa, ta tua nawale mayawaima. Ta wese tomotau ivunuvunuqima ta tua ge ada 'aliga.

<sup>10</sup> Ima'a 'ebenuavita tuta qabuna alobelobedi, ta tua nawale me ema qaiawa. Ima'a lukwaluk-wama, ta tua tomotau agivekaikaiwabuyedi. Ima'a ge ema kulufamo, ta tua Yaubada ena nuakolokolo 'inega yani aqiaqi otaqina ni'a alobea.

<sup>11</sup> Emavo me Kolinita ye, ima'a ema nuanua qabuna ni'a asimana 'ifoqeyedi 'imia, ta giwal-imega aveveyolubemi qiduana.

<sup>12</sup> Vonahaqiaqi, ima'a ema veyoluba 'imia ge ada lua'uya, ta 'esi omi'a emi veyoluba 'imaya ni'a ogivelua'udi.

---

\* 6:9: 2Kol 4:10

13 \* Nuanuagu ena vona 'imia kavona omi'a natugwavo. Ima'a giwalima qabuna ni'a aneimi, 'inega nuanuagu omi'a wese giwalimi ona neima. Vonahaqiaqi, giwalimi ge ona vegagedi!

*Ge kana luvetuba taudi ge ida vetumaqana maega*

14 \* Ge ona luvetuba taudi ge ida vetumaqana maega. Nage toveilivu aqiaqi be toveilivu veifa edi nuanua 'aidegana? Gebu! Ta wese 'idewani simatala be velovelovana ge ida ve'aidega, waisa?

15 Nage toadaumwala kana 'itea Keliso be Seitani nuanidia? Gebu! Ta wese 'idewani tovetumaqana be taudi ge ida vetumaqana edi ilivu be wese edi nuanua ge dave'aidega.

16 \* Ta wese ge ana fata be Yaubada otaqa be yaubada kavokavovo ina ve'aidega Vanue Gwalagwalana 'inaya. Nage ge oda alamania ita'a Yaubada mayawaina ena vanue gwalagwalana? Mana ba'e 'idewani Yaubada vonaya,  
 "Ya'a taudi maega ana toa,  
 ta ena luyaba dadana nuanidia.  
 'Inega ya'a edi Yaubada,  
 ta taudi egu tomotauyavo.

17 \* 'Inega Kaiwabu vonemi omi'a  
 ona 'ifoqe mai toveilivu veifa 'idiega  
 ta ona vetoasi'iemi taudi 'idiega.  
 Ta edi kulufa luveifadi ge ona gitonovidi,  
 ta wese edi ilivu bwavubwavuna  
 ge ona viaqidi.  
 'Inega ena 'ebe'ewemi egu 'abaga 'inaya.

---

\* 6:13: 1Kol 4:14 \* 6:14: Efe 5:11 \* 6:16: 1Kol 3:16; Luvi 26:12

\* 6:17: Ais 52:11; Ve 18:4

18\* E 'inega ya'a Tamami,  
ta omi'a natugwavo.

Ba'e 'idewani  
ya'a Kaiwabu Tovewaiwai yavonavona  
'aiqa."

## 7

<sup>1</sup> Egwavo, ba'e vona fofofola diavona Yaubada ni'a neida, 'inega luaqiaqieda be taudega kana givevunavunaqida yani qabuna bwavubwavudi 'idiega, mana yani diavona adi fata 'wafida be wese niboanida ina giveluveifedi. Ta wese kana vetafe'wa waiwai eda ilivu tunutunuqidi adi giveaqiaqi weaqina, mana ita'a Yaubada kamwaninivea 'inega ka'amayabea.

*Faulo ena qaiawa me Kolinita edi nuagivila weaqina*

<sup>2</sup> Nuanuama qiduana giwalimi ona siwa'edi 'imaya. Ima'a ge taha toga 'imiega ada giveluveifei. Ge taha toga ada ve'ita veifei be datoasi'i ena vetumaqana 'inega, ta wese ge taha toga ada u'avei.

<sup>3</sup> Egu vona diavona ba'e 'idiega ge nuanuagu ona 'wamomo, mana ni'a yavonemi omi'a tuta qabuna giwalimaya otoatoa. Vonahaqiaqi, ima'a aveveyolubemi qiduana, 'inega 'aliga ge ana fata navetoasi'iema 'imiega, ta wese ge taha yani eda toa bwa'obwa'oya ana fata be navetoasi'iema 'imiega.

<sup>4</sup> Ya'a ge eda venuana magilafu emi vetumaqana Keliso 'inaya weaqina, ta wese omi'a weaqimi yavonavona vane tomotau 'idia. Omi'a

---

\* 6:18: 2Sam 7:14; Iel 31:9

tuta qabuna ogigivewaiwaiegu, ta wese egu toa vitana 'idiega ogigiveqaiawegu.

5 \* Tuta nana alugu di'we Masidonia 'inaya, 'inega ge taha tuta ada veyawai, mana tuta qabuna vita taha taha alobedi. Ta mali to-motau maega ave'ae'aetoga, ta wese taumega amwaniniva.

6 Yaubada tauna tonuavita adi togivewaiwai. 'Inega Yaubada nana iagu Taitusi ena mai 'iguya 'inega giveqaiawegu ta wese givewaiwaiegu.

7 Vonahaqiaqi, Taitusi ena mai weaqina yaqa-iawa, ta wese omi'a weaqimi yaqaiawa gegoyo, mana simana 'iguya emi iula 'inaya weaqina. Ta wese vonegu emi lututa egu vayasa weaqina be, emi nuagivila emi veilivu veifa 'iguya weaqina, ta wese emi nuave'avina waiwaina weaqigu, e 'inega egu qaiawa veqidua va'ine.

8 \* Lova egu leta nugwenugweina 'inega ya-givenuavitemi, 'inega agu lutonova luveifa ta ya'wamomo leta nana weaqina ta taugu yalug-waeyegu yavonaya, "Tola'ai weaqina leta nana yavetunei me Kolinita 'idia?" Ta 'abibodanaya ge eda nuanua 'evivi leta nana ana vetune weaqina.

9 Ta 'esi ba'itagana yaqaiqaiawa leta nana ana vetune weaqina. Ge eda qaiawa egu givenu-avita 'imia weaqina, ta 'esi yaqaiqaiawa mana nuavita nana 'inega nuami 'eqa'uya ta 'inega onu-agivila ta oveilivu aqiaqi. Yaubada ena nuanua be ba'e nuavita nana ona lutonovia, mana ilivu diavona oviaqidi ge aqiaqidi. 'Inega ge eda

---

\* 7:5: 2Kol 2:13      \* 7:8: 2Kol 2:4



giveluveifemi leta nana 'inega, ta 'esi vona diavona 'idiega oveaqaqi.

10 \* Vonahaqaqi, nuavita wese yani aqiaqina, mana Yaubada ana fata nuavita nana navefewea eda nuagivila weaqina, ta nuagivila nana 'inega 'etoyavua ana 'eda kana salia. 'Inega ba'e nuavita nana weaqina ge daluaqiaqieda be kana 'awaluveifei. Ta 'esi ge aqiaqina 'eguma kana nuavita eda ilivu luveifadi weaqidi ta ge kana nuagivila, e 'inega eda vedeba 'i'wana vuaqina 'aliga.

11 'Inega o'itei, Yaubada awafelemi ba'e nuavita nana 'inaya, ta vuaqina yani aqiaqi otaqina weaqimi, mana tauna 'inega nuanuami qiduana Yaubada ona giveqaiawea emi ilivu 'idiega ta wese emi vona 'idiega. Ta wese nuavita nana 'inega taumiega ni'a ogivetunuqimi. Ta wese nuavita nana ve'itemi emi luveifana weaqina, e 'inega luveifa nana weaqina diami vilea. Ta wese nuavita nana 'inega mwaniniva olutonovia. Ta wese nuavita nana 'inega nuami 'eqa'uya ta 'inega vona ovetunea egu vayausa 'evivi 'imia weaqina. Ta wese nuavita nana 'inega ni'a o'awahaqiaqiegu ya'a emi tovaletuyana. Ta wese nuavita nana 'inega lova taha 'oloto ena luveifana weaqina ni'a oluvematasabuya. Ta ba'e viaqa diavona 'idiega ni'a ove'itegu omi'a yani qabuna aqiaqina oviaqia nuavita nana 'inega.

12 Lova egu leta nugwenugweina ge eda 'wayavia 'imia sabi veqae taha 'oloto ena luveifana weaqina, ta wese ge eda 'wayavia

---

\* 7:10: Md 27:3-5; Ibe 12:16-17

sabi vonami togama nuavita lobe'a 'oloto nana ena luveifana 'inega, ta 'esi egu 'wayavi 'iuna mana nuanuagu emi gwavubiga 'imaya Yaubada matanaya ona alamani aqiaqiea.

<sup>13</sup> Ba'e gwavubiga nana 'inega waiwai ta wese qaiawa ni'a alobea.

Ta wese Taitusi ena qaiawa omi'a weaqimi ema qaiawa luvetomanea, mana vonema ma'oda o'ebe'ewea ta wese emi iula 'inaya weaqina vonema. Ta ba'e 'inega lutionova aqiaqi otaqina oneia.

<sup>14</sup> Lova yavonavane Taitusi 'inaya weaqimi. Ta ena vayasa 'imia 'abibodanaya 'evivi mai 'iguya ta egu vonavane weaqimi 'awahaqiaqiea, mana yani qabuna ni'a yavonayea omi'a weaqimi taunega ni'a 'itedi 'imia.

<sup>15</sup> 'Inega ba'itagana Taitusi veveyolubemi qiduna, ta 'ala'alanuai emi 'amayaba 'inaya tuta nana o'ebe'ewa. Ta wese 'ala'alanuaiemi ma'oda ena ve'ita o'awahaqiaqiea ta omatayagea weaqina.

<sup>16</sup> 'Inega yaqaiqaiawa qiduana weaqimi, mana yahalamani aqiaqiea omi'a emi viaqayavo qabudi ona viaqidi ilivu tunutunuqina 'inega.

## 8

### *Tovetumaqana edi nei kavovo weaqina*

<sup>1</sup> \* Egwavo, nuanuagu ena vonemi ma'oda 'inega 'ekalesia taha taha di'we Masidonia gamonaya Yaubada ena nuakolokolo ive'itayea totafwalolo itoatoa 'abaga taha taha 'idia.

---

\* **8:1:** Lom 15:26; 2Kol 9:1-2

<sup>2</sup> Vonahaqiaqi, taudi me Masidonia tuta vitana be wese vita taha taha ilobedi, ta wese lukwalukwadi, ta tua edi qaiawa qiduana 'inega nuanuadi mali tomotau ina iuledi.

<sup>3-4</sup> 'Inega imai 'imaya ta ivenoqiema 'eguma ana fata be taudi wese edi nei kavovo ina viaqia Ielusalema ana tovetumaqanayavo weaqidi. Ta yavona aqiaqiemi, mataguyega ya'itedi edi nei kavovo qiduana adi fata 'inega iviaqia, ta wese ma ana luvetomana ia'uya. Ta ge taha toga ena luvine 'inega ba'e 'idewani ida viaqi, ta 'esi taudi edi nuenuaga.

<sup>5</sup> Vonahaqiaqi, nei kavovo qiduana ia'uya, ta wese nuama igivevoqania yani taha aqiaqi otaqina weaqina, mana nugweta taudiega iawafeledi eda Kaiwabu 'inaya ta wese ima'a 'imaya, mana nuanuadi Yaubada ena nuanua weaqidi ina alamaniana ta ina viaqia.

<sup>6</sup> Lova iada Taitusi wai 'imia ta ena ve'ita 'inega givewaiwaiemi emi nei kavovo weaqina. E 'inega Taitusi wese anoqiea avonaya, "Nuanuama o'a me Kolinita una vayausa 'eviviedi, ta una vona iuledi edi nei kavovo ana lu'ovoa weaqina."

<sup>7</sup> \* Omi'a me Kolinita yani qabuna ami fata. Omi'a emi vetumaqana waiwaina, ta wese emi vonayavo aqiaqi otaqidi. Omi'a emi alamani qiduana, ta wese togwavubiga. Omi'a emi veyoluba agona 'imaya. 'Inega nuanuagu wese emi nuakolokolo 'inega ona vewaiwai emi nei kavovo ana viaqa 'inaya.

<sup>8</sup> Egwavo, ni'a yavematamagilafuyemi di'we Masidonia ana 'ekalesiyavo weaqidi ma'oda inei

---

\* 8:7: 1Kol 16:1-2

kavovo 'aiqa. Ta ge eda luvini be omi'a wese 'idewani ona viaqia, ta 'eguma emi nuanua be ona nei kavovo aqiaqi 'idewani taudi, e 'inega ena alamani aqiaqiea omi'a emi veyoluba tomotau 'idia wese yani aqiaqi otaqina, ta ge u'ava.

9 \* Omi'a eda Kaiwabu Iesu Keliso ena veyoluba be wese ena nuakolokolo qiduana ni'a oalamani aqiaqiea. Tauna tovekaikaiwabu otaqa, ta tua omi'a weaqimi ena kaikaiwabu nokea ta velukwalukwa. Ta ena velukwalukwa 'inega ni'a ovekaikaiwabu.

10 Egu nuanua omi'a nei kavovo nana ya'wala gumwala ni'a ove'alea e wese ona lu'ovoia. Mana omi'a ba'e nuanua nana ogivevi'oinia, ta omi'a wese 'ekalesia qabudi onugwetedi nei kavovo nana ana a'u 'inaya.

11 Vonahaqiaqi, mane nana ana lugwagwa weaqina me emi waiwai ta wese me emi qaiawa ove'alea. 'Inega wese emi waiwaiega nei kavovo nana ona lu'ovoia. Ta nuanuagu nei kavovo nana ona a'uya emi mane ana 'etofwafwa 'inega.

12 \* Ta ge ona nuafania 'eguma nuanuami qiduana ona nei kavovo tomotau sabi iuladi, e 'inega Yaubada ona giveqaiawe'a 'eguma mane oa'ua'uya ami fata 'inega. Vonahaqiaqi, Yaubada ge daluvini be mane qiduana ona a'uya 'eguma ge mane qiduana 'imia da'eno'eno, ta 'esi nuanuana tola'ai ni'a 'imia 'eno'eno e ami 'etofwafwa 'inega ona nei kavovo.

13-14 Ta yahalalahalamanian ba'itagana omi'a

\* 8:9: Md 8:20; Fil 2:6-7 \* 8:12: Mk 12:43-44

mane qiduana 'imia, 'inega luaqiaqiem i be me Ielusalema ona iuledi. Ge eda vonavona vonigo emi mane qabuna ona nei kavovoyea be taumiega ona givevitemi emi toa 'inaya, ta 'esi nuanuagu iula nana 'inega toa aqiaqina ina lobe a omi'a emi toa 'idewani. 'Inega mali tuta 'inaya 'eguma omi'a toa vitana ona lobe a, e taudi wese adi fata be ina iula 'eviviem i. Ta ba'e 'inega taudi maega ona veiuula.

<sup>15</sup> \* Ba'e yani nana weaqina Buki Nugwenugweina simana vonaya, "Tomeqabu 'abwaga qiduana ilugwagwea ge taha wese tufwa ida lobe i, ta 'esi tomeqabu 'abwaga goyona ilugwagwea, e taudi ge ida botana."

### *Taitusi ma enavo edi fewa*

<sup>16</sup> Yalulukaiwa qiduana Yaubada 'inaya Taitusi weaqina, mana Yaubada iada nana ena qaiawa ta wese ena waiwai neia ami iula weaqina, 'idewani ya'a wese yaqaiqaiawa ta yanuanua weaqimi.

<sup>17</sup> Ta ema venoqi Taitusi 'inaya ena vayasa 'evivi 'imia weaqina 'awahaqiaqiea. Vonahaqiaqi, taunega wese ena nuanua qiduana be navayausimi.

<sup>18</sup> Taha wese 'oloto avevetunea Taitusi maega. Ba'e 'oloto nana wese taha tovetumaqana. Tauna lugaihi 'avana, ta ena lugaihi Iesu Valena weaqina 'ekalesia 'aidega 'aidega i'awahaqiaqiea.

<sup>19</sup> Ta 'ekalesia qabudi 'oloto nana ivenua'ivinea be tauna maega ana tauya me Ielusalema 'idia nei kavovo nana sabi neidi. Ta ba'e viaqa nana 'inega eda Kaiwabu awatubo nalobe a, ta wese

---

\* 8:15: 'Ifo 16:18

viaqa nana 'inega ina alamani aqiaqiea ima'a nu-  
anuama qiduana ana iuledi.

<sup>20</sup> Ema vemata'weabu 'iuna mana ge nuanuama  
tomotau nei kavovo nana weaqina ina venuana  
magilafu nage ina ve'ewema.

<sup>21</sup> Ta 'esi nuanuama eda Kaiwabu naqaiawa be  
wese na'awahaqiaqiema ema ilivu tunutunuqina  
mane ana 'itamaki weaqina, ta wese nuanuama  
tomotau ina 'awahaqiaqiema ba'e weaqina.

<sup>22</sup> Ni'a avonemi iada Taitusi be wese tolu-  
gaihi nana iwaiwai sabi vayausimi. Ta wese 'oloto  
taha vetoidi avetunea taudi maega iwaiwai 'imia.  
Tuta qabuna ena fewa be wese ena viaqa qabudi  
'idiega taunega ve'itayea tauna togwavubiga aqi-  
aqi, 'inega a'awahaqiaqiea. Tauna lova ena nu-  
anua be omi'a me Kolinita naiulemi, ta ba'itagana  
ena nuana ba'e weaqina veago va'ine, mana  
valemi noqolia ta alamani aqiaqiea emi awafela  
weaqina.

<sup>23</sup> Ta 'eguma vaidi tomotau ina vetala'aiemi  
Taitusi weaqina, e 'inega ona simana 'idia ya'a  
iada nana maega afewafewa 'aidega ami iula  
weaqina. Ta 'eguma wese ina vetala'aiemi  
magilafudina weaqidi, 'inega ona vonedi taudi  
'ekalesia edi tovaletuyanayavo Iesu Valena  
weaqina. Ta edavo dina edi fewa 'inega Keliso  
awatubo nalobe

<sup>24</sup> \* Ima'a 'ekalesia qabudi 'idia weaqimi avon-  
avona vane emi ilivu aqiaqidi weaqina. 'Inega  
toi dina ona 'ebe'ewedi be ona veyoluba aqiaqiedi.  
Ta ba'e 'inega 'ekalesia qabudi ina alamani aqi-  
aqiea ima'a ema vonavane weaqimi ge wese

---

\* **8:24:** 2Kol 7:13-14

u'ava, ta 'esi vonahaqiaqi.

## 9

*Me Kolinita edi nei kavovo me Ielusalema weaqidi*

<sup>1</sup>\* Ya'a ge daluaqiaqiegu be ena 'wayavi 'evivi 'imia emi nei kavovo Yaubada ena tomotauyavo 'abaga Ielusalema 'inaya weaqidi,

<sup>2</sup>mana ni'a yahalamaniana omi'a nuanuami qiduna me Ielusalema ona iuledi. Ta omi'a weaqimi ni'a yavonavane me Masidonia 'idia ta yavonedi omi'a me Akaya emi nei kavovo ni'a o'iva'ava'aia ya'wala gumwala 'inaya. Ta wese yavonedi omi'a me emi waiwai ta wese me emi qaiawa nei kavovo nana ogivevi'oinia. Ta ba'e 'inega to'ekalesia Masidonia 'inaya ni'a ogivewaiwaiedi ta wese ovenu'ewedi, e 'inega taudi wese ni'a ive'ale sabi iula.

<sup>3</sup>Inega taidavo toi dina yavetunedi iwaiwai sabi 'itami, mana ni'a yavonavane weaqimi yavonedi omi'a ni'a o'iva'ava'ata ta oba'eba'e. 'Inega nuanuagu egu vonavane omi'a weaqimi vuaqina ina 'ita aqiaqiea,

<sup>4</sup>mana ge ana 'ita aqiaqina 'eguma ya'a vaidi me Masidonia maega ana wai ta nei kavovo nana nawale ge ana 'iva'ava'aimo. Vonahaqiaqi, yani 'ebeiniyauyau 'iguya, ta wese yani 'ebeiniyauyau 'imia, mana ni'a yavonavane weaqimi.

<sup>5</sup>E 'inega yanuanua be taidavo toi dina yavetune nugwetedi sabi 'itami, mana nuanuagu ena alamani aqiaqiea 'eguma emi vona fofofola

---

\* 9:1: 2Kol 8:1-7

mane nana weaqina ni'a o'iva'ava'aia. Ta nuanu-  
agu veyolubega ona nei kavovo, ta gebu 'alakeikei  
'inega.

6 \* Ta ona nuave'avinia, 'eguma tonitalaqa  
vewana 'evisa namo nadaunia, e 'inega wese  
'abwaga goyona nalobea. Ta 'eguma taha toga  
vewana qiduana nadaunia, e 'inega wese 'abwaga  
qiduana nalobea.

7 'Inega omi'a 'aidega 'aidega taumi ona nuanua  
ma'oda ona nei kavovo 'aiqa. Ta mane nana ge  
ona a'u me emi nuavita nage lukei 'inega, ta  
'esi qaiawega, mana togama qaiawega ena mane  
a'ua'uya, e ba'e tomotau nana Yaubada 'awa'awa  
aqiaqiea ena ilivu aqiaqina weaqina.

8 Ta Yaubada ana fata be yani taha taha naneimi  
emi toa weaqina, e 'inega omi'a ge taha yani 'inega  
ona kusa, ta 'esi tuta qabuna ami iula ma luve-  
tomanina ona lobea, e 'inega omi'a ami fata be  
iula qiduana ona a'uya viaqa aqiaqidi taha taha  
weaqidi.

9 \* 'Idewani Buki Nugwenugweina vonaya,  
"Taha toga 'eguma nei kavovo agona  
lukwalukwadi neineidi,  
e tauna ena viaqa aqiaqi otaqina  
ba'e ge nahawala."

10 \* Yaubada tauna vewana tovaoga neineia, ta  
vewana nana 'inega 'abwaga 'ifoqe 'ai weaqina.  
Ta wese 'idewani Yaubada omi'a vewana qid-  
uana naneimi ta ina ve'eala. 'Inega bolimana  
qidua va'inena Yaubada nalobea emi ilivu aqi-  
aqidi 'idiega.

---

\* 9:6: Vos 11:24-25    \* 9:9: Same 112:9    \* 9:10: Ais 55:10



11 \* Vonahaqiaqi, Yaubada nagivekaikai-wabuyemi yani qabuna 'idiega emi toa 'inaya. Ta ba'e 'inega ami fata ona nei kavovo aqiaqi tuta nana vita taha taha i'ifo'ifoqe. Ta tuta nana emi nei kavovo ana tauyea totoa vita 'idia 'inega ina lukaiwa qiduana Yaubada 'inaya.

12 'Inega emi nei kavovo 'inega yani aqiaqina magilafudi kana 'itedi, e ba'e: Yaubada ena to-motauyavo tola'ai 'inega ikusa adi fata ina lobe, ta wese edi qaiawa qiduana 'inega ina lukaiwa Yaubada 'inaya.

13 Emi viaqa aqiaqina 'idiega tomotau ina 'awahaqiaqiem, mana ba'e 'inega emi vetumaqana ina 'itea ta ina alamani aqiaqiea ge yani kavokavovo ta 'esi vonahaqiaqi. 'Inega emi matayaga Iesu Valena weaqina be wese emi iula qiduana taudi 'idia weaqina ina lukaiwa Yaubada 'inaya.

14 'Inega giwali otaqidiega ina venoqi weaqimi Yaubada 'inaya, mana ena nuakolokolo qidua va'inena ni'a neimi.

15 Ta luaqiaqieda be kana lukaiwa Yaubada 'inaya, mana tauna Natuna nei kavovoyea 'idaya, ta ba'e nei kavovo nana ana maisa ge kana vona!

## 10

### *Faulo taunega vata'ita'iea*

1 \* Egwavo, Keliso ena ilivu nuvana ta wese me ena nuawebui, 'inega ya'a tauguna wese ilivu diavona 'idiega yavenoqiem, egu vona ba'e

---

\* 9:11: 2Kol 1:11; 4:15      \* 10:1: 1Kol 2:3

leta nana 'inaya ona noqola aqiaqiedi. Ni'a yahalamaniana vaina 'imiega ovonaya, "Faulo ena letayavo 'idiega vona falafaladi 'inega vonavona 'idaya, ta 'eguma taunega namai 'idaya, e nawale namwaniniva."

<sup>2</sup> \* Ta nawale ena wai sabi vayausimi. 'Inega yavenoqiemi, ona awafelegu be me egu nuawebui ena wai kana toa. Ta 'eguma vaina 'imiega ona ve'ewema ona vonaya vonigo ima'a tovaletuyana ema viaqayavo aviaviaqidi kavona Yaubada ana tovemwage edi viaqa 'idewani, ta ge kavona tovetumaqana edi ilivu 'idewani. E 'inega vona wai-waidi 'idiega ena lugaihimimi.

<sup>3</sup> Vonahaqiaqi, ima'a tovaletuyana wese bwa'obwa'oya atoatoa omi'a 'idewani. Ima'a avevedavi toluveifana maega, ta gebu totoa bwa'obwa'o edi nuanua 'inega be edi ilivu 'inega ada vevedavi.

<sup>4</sup> \* Ima'a ge tomotau edi 'ebevedavi ada ve-fewedi ema vedavi 'inaya Seitani maega, ta 'esi ima'a Yaubada ena 'ebevedavi waiwaidi aveve-fewedi Seitani ena waiwai sabi bwega yavulina.

<sup>5</sup> Ima'a Yaubada ena nuanua ahalamani aqiaqiea. Ta vaidi tomotau ba'e alamani nana weaqina ive'ae'aetoga ta taudi edi nuanua weaqina inuavane. Ta ima'a Yaubada ena 'ebevedavi 'inega ba'e tomotau diavona edi nuanuayavo luveifadi agivelua'udi, ta 'inega aveve'itedi be edi nuanua 'inaya Keliso namo ina matayagea.

<sup>6</sup> Emi 'ekalesia gamonega tomotau koyadi ema ve'ita Keliso weaqina ni'a ivelumamatayagea ta

---

\* **10:2:** 1Kol 4:21      \* **10:4:** Efe 6:13-17

i'awahaqiaqiea. Ta vaidi nawale ge Keliso ida matayagea, e 'inega tomotau diavona ana luve-matasabudi.

<sup>7</sup> Omi'a tomotau adi 'ita 'inega oveveqaevedi. 'Inega vaina 'imiega ivonaya be taudi vonahaqiaqi Keliso ena tomotauyavo, ta ima'a gebu. Ta yavona aqiaqiemi, nuanuagu nuadi na'eqa'uya ta ina alamania ima'a wese Keliso ena tomotauyavo 'idewani taudi.

<sup>8</sup> \* Ba'e egu vona diavona nage adi noqola kavona tufwana eda nuavane ima'a tovaletuyana ema 'abiluvine Keliso neima weaqina. Ta ba'e 'abiluvine nana neima sabi givewaiwaiemi, ta gebu sabi giwebuiemi. E 'inega ya'a ge eda 'wamomo egu vona diavona weaqidi.

<sup>9</sup> Ge ona vonaya be ya'a egu leta adi 'wayavi 'iuna vonigo nuanuagu ena givemwanivemi,

<sup>10</sup> mana vaidi tomotau ivonaya, "Ge kana nuanua Faulo weaqina. Tauna ena leta 'idiega vona waiwaidi neineida ta wese vona diavona 'idiega luviluvineda. Ta 'esi 'eguma taunega namai 'idaya, e 'inega kana 'itea ge ena waiwaimo be wese ena lugaihi ge ana aqiaqimo!"

<sup>11</sup> Ta yavona aqiaqiemi, nuanuagu ba'e tomotau diavona ina alamani aqiaqiea tola'ai ilulutonovia ema leta 'inega, e ba'e luttonova nana ge wese nave-dumaduma 'eguma ima'a omi'a maega kana toatoa ta ana tovolu nuanidia sabi lugaihidi. Mana ema vona be wese ema ilivu ge davedumaduma ema leta 'idiega 'eguma omi'a maega kana toatoa.

<sup>12</sup> Ima'a ge nuanuama ana giveleleqema tonu-avane maega, mana taudiega ivonaya be taudi

---

\* **10:8:** 2Kol 13:10

adi 'aidega aqiaqi otaqidi, ta taudiega ma ediavo igiveleleqedi. Ta wese adi qabu gamonaya taudiega ma ediavo edi luvine ia'udi ta i'abi'abibodedi, ta ge ida nuanua mali tomotau edi luvine weaqidi. Ta ba'e viaqa diavona viaqa kwavakwava.

13 \* Vonahaqiaqi, ima'a tovaletuyana wese anuanua vane, ta ge ama 'etofwafwa ema nuanua vane weaqina ada nogei. Ta 'esi Yaubada ena 'etofwafwa 'inega anuanua vane ema fewa nana neima weaqina. 'Inega ama fata ana nuavane, mana Yaubada nuanuana ba'e fewa nana ana viaqia wese omi'a weaqimi.

14 Ima'a ge ama fata be ada vonavane 'eguma lova ge ada wai 'imia sabi fewa. Ta vonahaqiaqi, ima'a tovaletuyana luluvaiega amaduwai 'imia ta Keliso Valena Aqiaqina aneimi.

15 Ima'a tauma ema fewa aqiaqina 'imia weaqina avonavona vane, ta ge ada vonavane mali tomotau edi fewa weaqina. Ta 'esi nuanuama qiduana emi vetumaqana nave'ena'i, ta wese nuanuama ema fewa nuanimia nave'ena'i,

16 be yaqisa ama fata emi di'we 'inega ana 'ifoqe be ana tauya sabi lugaihi mali di'we 'idia lova ge taha toga Vale Aqiaqina dalugaihiea 'idia, mana ge daluaqiaqiema be taumega ana givaneyema 'eguma taha toga Vale nana ni'a lugaihiea di'we nana 'inaya.

17 \* Ba'e yani nana weaqina Buki Nugwenugweina simana vonaya, "Eguma taha toga nuanuana nanuavane, e 'inega luaqiaqiea be eda Kai-

---

\* 10:13: Lom 12:3      \* 10:17: Iel 9:24; 1Kol 1:31

wabu namo ena viaqayavo weaqidi nanuavane.”

18 \* Tomotau edi nuavane taudimo weaqidi ge taha ana aqiaqimo, ta 'esi 'eguma eda Kaiwabu taha toga na'awahaqiaqiea, e 'inega tauna aqiaqi otaqina.

## 11

*Faulo ena vona tovaletuyana 'e'eu'au'avididi weaqidi*

1 Egwavo, nage ovonaya be ya'a egu vona kavona be tovekwavakwava edi vona. 'Inega nuanuagu ona bibitaqomi, ta egu vona ba'e ona noqolia.

2 \* Ya'a me egu ve'ifi'ifi yatoatoa 'idewani Yaubada ena ve'ifi'ifi, mana omi'a 'ekalesia kavona taha iaba matayauyona ni'a yagabuinoqia taha 'oloto weaqina ta maega ina vaqi, ta ba'e 'oloto nana tauna Keliso.

3 \* Ba'e 'iuna 'inega giwaligu a'ala weaqimi, ta yanuaia nawale tove'ita luveifadi edi ve'ita 'inega emi awafela Keliso weaqina ona nokea, ta ona tauya gei 'idewani lova taha mwata Ibi u'avedi 'inega itauya gei.

4 \* Ana 'ita kavona omi'a tomotau edi ve'ita taha taha o'awahaqiaqiedi, waisa? Taudi ge ida lugaihi Iaisu aqiaqi weaqina 'idewani ima'a ema lugaihi, ta 'esi mali Iaisu weaqina ilulugaihi ta ovevetu-maqanedi. Ta wese lova Niboana Gwalagwalana weaqina alugaihimi ta Yaubada 'inega o'ewea. Ta ba'itagana mali niboana o'awahaqiaqiea. Ta wese

\* 10:18: 1Kol 4:4      \* 11:2: Efe 5:26-27      \* 11:3: Nug 3:4,13

\* 11:4: Gal 1:8-9

lova ema lugaihi Ieisu Valena Aqiaqina weaqina onoqolia ta o'awahaqiaqiea, ta ba'itagana ana 'ita kavona mali vale ovevetumaqanea.

5 \* Taudiega igabedi tovaletuyana aqiaqi otaqidi, ta yanuaia taudi edi ve'ita be edi alamani 'idiega ge ida veqidua va'inegu.

6 \* Ya'a lova ge eda sikulu veqae nage lugaihi weaqina, ta toyani weaqina yalulugaihi, e yani diavona yahalamani aqiaqiedi. Ta yanuaia omi'a wese ni'a oalamani aqiaqiea ya'a egu vonayavo vonahaqiaqi, mana ema ve'ita 'inega be wese ema viaqa taha taha 'idiega ni'a ave'ita 'ifoqeyedi 'imia.

7 \* Lova yawai 'imia Ieisu Valena ana lugaihi weaqina, ta gebu maisa nage 'abwaga 'imiega weaqina eda nuanua. Ta 'esi tauguyega yagiwebuiegu ta yavetofewa omi'a weaqimi, mana nu-anuagu ena givaneqemi be yaqisa ona alamania omi'a yani qiduana. Ta ona nuaia nage luveifana yaviaqia ba'e viaqa nana 'inega, waisa?

8 \* 'Ekalesia taha taha edi nei kavovo 'iguya ya'awahaqiaqiea ta ya'ewea, ta mane nana yavefewea sabi iulami be yaqisa ge taha maisa weaqina eda venoqiem. E ba'e 'inega kavonaya eda vanawala 'ekalesia diavona 'idiega.

9 Lova tuta nana ya'a omi'a maega katoatoa yani qabuna 'idiega yakusa, ta ge eda noqiem iula weaqina. Ta 'esi iula yalobea taigwavo 'idiega tuta nana imai 'iguya di'we Masidonia 'inega. Vonahaqiaqi, lova ge taha tuta eda venoqiem iula

---

\* 11:5: 1Kol 15:10; 2Kol 12:11 \* 11:6: 1Kol 2:1,13 \* 11:7: 1Kol 9:18 \* 11:8: Fil 4:15-16; 2Kol 12:13

weaqina, ta wese ba'itagana nage tuta maimai 'idia ge wese ena venoqiemi iula weaqina.

<sup>10</sup> Ya'a Keliso yahalamani aqiaqiea, mana ni'a maega ave'aidega. 'Inega yavona aqiaqiemi, ge taha toga di'we Akaya gamonega ana fata na'etobodegu egu nuavane ba'e yani diavona weaqidi.

<sup>11</sup> Nage vaina 'imiega ovonaya, "Faulo ba'e 'idewani vona 'aiqa, mana ge daveyolubeda!" Ta yavona aqiaqiemi, Yaubada ni'a alamani aqiaqiea ya'a yaveveyoluba aqiaqiemi!

<sup>12</sup> Lova ge eda venoqiemi iula weaqina ta wese ba'itagana ge nuanuagu ena venoqiemi iula weaqina. Ta egu noga 'iuna mana ge nuagu tovaletuyana luveifadi ina nuavane ina vonaya taudi edi fewa be ima'a ema fewa 'aidegana. Ta yavona aqiaqiemi taudi be ima'a ema fewa ge dave'aidega, mana taudi tuta qabuna mane be iula taha taha weaqina ivevenoqiemi, waisa?

<sup>13</sup> Vonahaqiaqi, taudi tovaletuyana 'eu'au'avidi ta tofewa luveifadi! Ta nuanuadi edi fewa be wese edi ilivu 'inega ona 'ita 'inamedi vonigo taudi Keliso ena tovaletuyanayavo. Ta 'esi iu'au'avemi.

<sup>14</sup> Ta ge nuami navoqana edi ilivu weaqina, mana Seitani wese ana fata naveilivu kavonaya be Yaubada ena tovale'ewa simasimatalina 'idewani.

<sup>15</sup> 'Inega ge kana nuavoqana 'eguma Seitani ena tofewayavo wese 'idewani ina veilivu 'aiqa kavonaya be taudi Yaubada ena tofewayavo, ta adi 'ita kavona yani aqiaqina ida viaviaqidi. Ta nawale tuta maimai 'inaya ve'ia qiduana ina lobeana edi ilivu luveifana ana 'etofwafwa 'inega.

*Faulo ena nuavane ena toa vitana weaqina*

<sup>16</sup> Egwavo, nuanuagu wese ena vona 'eviviemi, ge taha toga 'imiega una vonaya be ya'a kwavakwavagu. Ta tua 'eguma ona nuaia vonigo ya'a kwavakwavagu, e 'inega egu vekwavakwava ona 'awahaqiaqiea, 'inega ya'a wese nuanuagu tufwana ena nuavane weaqigu 'idewani tovaletuyana 'e'eu'au'avidi taudiega inuanua vane.

<sup>17</sup> Egu vonavane taugu weaqigu gebu eda Kaiwabu ena nuanua 'inega, mana ya'a egu vona kavona be tokwava taha ena vona.

<sup>18</sup> Tomotau qabudi inuanua vane edi viaqayavo bwa'obwa'oya weaqidi, e 'inega ya'a wese nuanuagu ena nuavane 'idewani taudi.

<sup>19</sup> Ba'e 'idewani yavona 'aiqa 'imia, mana omi'a tovaletuyana kwavakwavadi me emi qaiawa edi ve'ita onoqonoqolia ta o'abi'abibodea, ta taumiega ovonaya be omi'a toalamani aqiaqi, ta 'esi gebu!

<sup>20</sup> Omi'a tovaletuyana luveifadi ge oda givelua'udi tuta nana iveilivu veifemi kavona omi'a edi tofewa kavovo be, emi kulufa qabudi i'ekilidi be, ivekaiwabu omi'a weaqimi be, iawawebuiemi be wese i'aunanavemi, ta omi'a obibitaqomi.

<sup>21</sup>\* 'Inega ya'a me egu iniyauyau yavonevonemi ima'a ge me ema giwalifatu be ilivu diavona ada viaqidi 'idewani taudi iviaqia 'imia, waisa?

Vonahaqiaqi, tovaletuyana luveifadi me edi giwalifatu inuavane edi viaqayavo weaqidi, 'inega

---

\* **11:21:** Fil 3:5



ya'a wese kavona tokwava taha me egu giwalifatu vaina yani weaqina ena vonavane.

22 Taudiega igabedi me Ibeliu, waisa? Ta wese ya'a 'idewani. Taudiega igabedi me Isileli, waisa? Ta wese ya'a 'idewani. Ta wese taudi Ebelamo tubunavo, waisa? Ta wese ya'a 'idewani.

23 \* Ta wese ivonaya vonigo taudi Keliso weaqina ivetofewa, waisa? Ta yavonevonemi ya'a egu vetofewa Keliso weaqina veqidua va'inedi. Nage egu vona ana noqola kavona tokwava taha ena vona, ta yavona aqiaqiemi, ya'a egu lugu vanue 'ebeyoqona 'inaya Keliso weaqina 'eala wawasai, ta 'abiboda taudi. Ta wese vunuqa 'eala wawasai ge adi avomo ni'a yalobedi, ta 'abiboda taudi. Ta wese tuta qabuna ya'ali'aliga 'waqi.

24 \* Ta wese me Diu tuta ana yau faibi ikafigu ta iluvematasabugu wayo metametanega. Ta luve-matasabu dina ana alamani ba'e: Nugweta imadu-vunuqa dadanegu ana yau 39. Ta wese 'idewani tuta vemagilafuna be, vetoina be, vefoana ta wese 'ebeluv'ovoa vunuqa 39 yalobedi.

25 \* Ta wese tuta toi 'idia 'aiweyega ivunuqigu. Ta wese taha tuta 'inaya daboyega iludabogu. Ta wese tuta toi 'idia veilage wagega yalobea mwade'waya. Ta taha tuta 'inaya velovana 'aidegana be wese 'aubena 'aidegana 'alu'alua dadanegu malavetaya.

26 \* Ta wese 'eda kuena yatautauyia egu luyaba dadana di'we taha taha 'idia. Ta luyaba nana

---

\* **11:23:** Via 16:23 \* **11:24:** Luve 25:3 \* **11:25:** Via 16:22; 14:19

\* **11:26:** Via 9:23; 14:5

'inaya 'ebeveilage yalobedi 'idewani seuseu be wese tovanawala 'idiega. Ta wese vita taha taha yalobedi egu tomotauyavo me Diu 'idiega, ta wese taudi ge me Diu 'idiega. Ta wese 'ebeveilage yalobedi 'abaga qiduqiduadi ta di'we 'ava'avana 'idia, ta wese mwade'wa 'inaya wedilia be nufula qiduqiduadi igiveluveifegu. Ta wese 'ebeveilage yalobedi tovaletuyana 'eu'au'avididi 'idiega.

<sup>27</sup> Vonahaqiaqi, egu fewa vitana 'inega visiqa be siniqaiqai yalobea, ta wese velovelovana vaina 'idia ge eda 'eno aqiaqi. Vaina tuta ge agu 'abwagamo 'inega yabotana, ta wese vaina tuta magagu kwavuga mana ge agu go'ilamo. Ta wese vaina tuta guga'u vunugigu, mana egu luyaba dadana 'inaya ge egu bwahamo ta wese agu kaleko eabuabudi.

<sup>28</sup> Vonahaqiaqi, toa vitana qabudi ni'a yalobedi, ta vita diavona adi luvetomana 'ekalesia taha taha, mana tuta qabuna yanuanua qiduana Yaubada ena tomotauyavo weaqidi ma'oda itoatoa 'aiqa.

<sup>29</sup> Ta tuta nana tovetumaqana taha nadawalili, 'inega kavona ya'a wese eda dawalili. Ta wese tuta nana tovetumaqana taha natauya gei ta nabe'u, e 'inega nuagu vita qiduana.

<sup>30</sup> Ta 'eguma ya'a taugu weaqigu ena nuavane, 'inega nuanuagu ena nuavane yani diavona igi-givedawaliligu weaqidi.

<sup>31</sup> Yaubada eda Kaiwabu Ieisu Tamana kana awatuboya tuta qabuna. Tauna ni'a alamania egu vona ba'e vonahaqiaqi.

<sup>32</sup> \* Ta wese 'ebevetalatutula taha ena vonemi

---

\* **11:32:** Via 9:23-25

egu toa vitana weaqina. Lova tuta nana 'abaga Damasiko 'inaya yatoatoa 'inega 'abaga nana ana kini ana wawa Alitasi ena gavana ana to'itamakiavo luvinedi be 'abaga nana ana 'awayavo ina 'itamaki aqiaqiedi be yaqisa ina kafigu.

<sup>33</sup> Ta ge adi fata, mana egwavo vaina iusegu kwalisi taha 'inaya ta 'abaga nana ana sifa debanega ana 'ebelubo'e 'inega wayoyega ivekaliligu yawebui bwa'obwa'oya ta 'idiega yadena.

## 12

### *Faulo mahala 'itea*

<sup>1</sup> Wese nuanuagu vaina yani weaqidi ena vonavane. Vonahaqiaqi, nuavane ilivuna ge yani aqiaqina, ta nuanuagu ena vematamagilafuyemi vaina yani weaqidi, ta ba'e yani diavona eda Kaiwabu taunega ve'ifoqeyea, ta wese ena nuanua simana 'ifoqeyea 'iguya.

<sup>2</sup> Taha 'oloto yahalamani aqiaqiea, tauna Keliso ena tomotau. Ta ba'e 'oloto nana ya'wala 14 gumwala 'inaya Yaubada ena waiwaiega mahala deba otaqinaya givaneyea. Ta ge eda alamania 'eguma ma 'wafina vaneqa nage niboaninega, ta 'esi Yaubada ana 'aidegamo alamani aqiaqiea.

<sup>3-4</sup> Ta ya'a yahalamani aqiaqiea 'oloto nana Yaubada givaneyea Faladaisi 'inaya, ta ge eda alamania 'eguma ma 'wafina nage niboaninega vaneqa, ta 'esi Yaubada ana 'aidega alahalamania. Ta oa'e 'inaya vaina yani 'ebenuavoqana noqolidi. Ta Yaubada 'etobodea ge taha yani weaqina ana fata naveqaeyedi.

<sup>5</sup> Ta tola'ai 'ifoqe ba'e 'oloto nana 'inaya weaqina nuanuagu ena vonavane, ta ge nuanuagu tauguyega ena nuavane. Ta 'esi 'eguma ena vonavane taugu weaqigu 'inega nuanuagu egu dawalili namo weaqina ena nuavane.

<sup>6</sup> Vonahaqiaqi, yani koya weaqidi agu fata be ena vonavane. Ta ge taha toga ana fata be nagabegu tokwava 'eguma yani diavona weaqidi yavonavonavane, mana yani diavona ni'a i'ifoqe aqiaqi mataguya. Ta ge nuanuagu ena vonavane ba'e yani diavona weaqidi, mana ge nuagu tomtau ina givaneyegu ba'e 'ita nana weaqina ta ina 'awahaqiaqiegu, ta 'esi nuanuagu egu fewa be wese egu lugaihi 'idiega ina givaneyegu.

<sup>7</sup> \* Vonahaqiaqi, yani aqiaqi otaqina Yaubada ena ve'ita 'inega ni'a i'ifoqe 'iawaguya. Ta Yaubada ge nuanuana be ya'a taugu ena givaneyegu ba'e yani diavona weaqina, 'inega Yaubada Seitani awafelea taha niboana luveifana luvetunei 'iguya ta visiqa neigu be yaqisa ge taugu weaqigu ena nuavane.

<sup>8</sup> Ta ya'a tuta toi 'idia ni'a Yaubada yavenoqiea be visiqa nana na'ewa yavulea 'iguyega.

<sup>9</sup> \* Ta Yaubada vona ve'iegu vonaya, "Yani 'aideganamo luaqiaqieu, ta ba'e yani nana egu nukolokolo. Mana ya'a egu waiwai ana fata ena vefewea o'a 'iuya tuta nana dawalili ulobelobea." E 'inega yaqaiqaiawa ta yanuavane egu dawalili weaqina, mana dawalili nana 'inega Keliso ena waiwai ana fata be navefewea 'iguyega.

<sup>10</sup> Vonahaqiaqi, yaqaiqaiawa qiduana dawalili

---

\* 12:7: Iob 2:6      \* 12:9: Fil 4:11-13

'inaya be, awagila 'inaya be, veilivu veifa 'inaya be, vevoalana 'inaya ta wese vita be visiqa taha taha 'idia, 'eguma ba'e yani diavona Keliso weaqina yavevebaedi. Mana tuta nana yadawadawalili, e 'inega wese Keliso gigivewaiwaiegu.

*Faulo ena nuanua Kolinita ana to'ekalesia weaqidi*

11 \* Egu nuavane 'inega yaveilivu kavona tokwava taha 'idewani, ta omi'a emi viaqa 'inega ba'e 'idewani yaveilivu 'aiqa. Ya'a kavona tomotau kavokavovo, ta omi'a luaqiaqiemi be oda 'awahaqiaqiegu, mana emi tovaletuyana 'eu'au'avidu ge ida veqidua va'inegu.

12 \* Lova tuta nana omi'a maega katoatoa 'inega yani taha taha 'idiega taugu yave'ita 'ifoqeyegu ya'a tovaletuyana aqiaqi ta Yaubada taunega ena nuanua 'inega vetunegu yawai 'imia. 'Inega me egu bibitaqo 'ebe'ita be, viaqa waiwaidi ta wese yani 'ebenuavoqana yaviaqidi omi'a 'ekalesia nu-animia.

13 \* Egu luvivila 'inaya 'ekalesia 'aidega 'aidega 'idia tuta qabuna ilivu 'aidegana 'inega yaveilivu 'aiqedi. Ta omi'a wese ilivu nana ni'a olobea 'iguyega. Ta yani 'aideganamo ge eda viaqi nu-animia, mana ge taha tuta emi toa eda givevitei 'idewani mali 'ekalesia edi toa yagivevitea, mana taudi 'idiega iula taha taha ya'ewea. Ta ba'e egu luveifana 'imia weaqina ona nuataqogu, waisa?

14 Egwavo, tuta ba'e 'inaya nuanuagu egu vayausa vetoina ena viaqia 'imia. Ta vayausa nana

---

\* 12:11: 2Kol 11:5      \* 12:12: Lom 15:19      \* 12:13: 2Kol 11:9

'inaya emi toa ge nuanuagu ena givevitei iula taha taha 'idiega. Mana ge nuanuagu emi mane nage emi kulufa, ta 'esi nuanuagu omi'a. Ba'e egu vona ena givesimatalia vona sesebai ba'e 'inega. Gogama goyogoyodi ge daluaqiaqiedi be 'abwaga ina gimwane inadiavo be tamadiavo weaqidi, ta 'esi ina be tama luaqiaqiedi be natudiavo adi 'abwaga ina nei kavovodi.

<sup>15</sup> 'Inega egu vayausa 'imia 'inaya me egu qa-iawa yani qabuna 'iguya i'eno'eno ena vefewedi omi'a ami iula weaqina, ta wese tauguyega ena awafelegu 'imia niboanimi edi veaqiaqi weaqina. Ta 'eguma ya'a egu awafela 'inega egu veyoluba qiduana yave'ifoqeyea 'imia, e 'inega omi'a emi veyoluba 'iguya ge ona givegoyoi, waisa?

<sup>16</sup> Omi'a ni'a oalamani aqiaqiea lova egu wai 'inaya ge eda givevitemi egu toa weaqina. Ta vaina 'imiega nawale inuaia be u'avega yani taha taha eda 'ewedi 'imiega taugu weaqigu.

<sup>17</sup> Ta wese lova taidavo yavetunedi iwai sabi iulami. Ta ona nuaia, nage taudi vaina yani i'ewedi 'imiega ya'a taugu weaqigu?

<sup>18</sup> \* Ta wese lova taida Taitusi yavenoqiea be navayausimi, 'inega tovetumaqana taha maega yavetunedi iwai. Ta ona nuave'avinia Taitusi weaqina, nage tauna ena wai 'inega taunega weaqina vaina yani 'imiega u'avega 'ewedi ta vefewedi tauna ena veaqiaqi weaqina? Vonahaqi-aqi, gebu! Mana taida nana be ya'a ema ilivu be wese ema viaqayavo ge ida vedumaduma.

<sup>19</sup> Ta nage ovonaya be ima'a ema vona diavona

---

\* **12:18:** 2Kol 8:6,16-18

ba'e 'idewanina, mana nuanuama taumega ana vata'ita'iema. Gebu'e otaqa! Ta 'esi ima'a ba'e 'idewani avonavona 'aiqemi, mana ima'a Keliso ena tofewayavo, ta ahalamani aqiaqiea Yaubada ema vona noqolia ta 'awahaqiaqiea. Egwavo, ema viaqayavo qabudi aviaviaqidi sabi givewai-waiemi.

<sup>20</sup> Tuta qabuna yanuanua qidwana weaqimi, mana yanuaia nawale egu wai 'inaya vaina ilivu luveifadi ena lobedi omi'a 'ekalesia nuanimia, 'idewani ve'ae'aetoga be, ve'ifi'ifi be, diavilavila be, vemanuguba be, 'awaluveifa be, vevonavona be, nuavane ta wese vaina ilivu luveluveifadi. Ta 'eguma ba'e ilivu diavona ena lobedi nuanimia 'inega adi ve'ia 'iguyega weaqidi ge wese ona qaiawa.

<sup>21</sup> \* Vonahaqiaqi, giwaligu tufwana visiqa egu wai 'evivi weaqina, ta yanuaia Yaubada matanaya ena iniyauyau omi'a emi ilivu weaqidi, mana wai nana 'inaya ena lobemi lova 'idewani, ta ge oda nuagivila ilivu luveifa diavona 'idiega 'idewani ilivu bwavubwavudi be velamo'eno kavokavovo. Ta wese yanuanua be 'wafi ena nuanua ilivu luveifana weaqina nawale me emi qaiawa oviaviaqidi, ta ge oda nogedi.

## 13

### *Faulo ena vematamagilafu 'ebelu'ovoa*

<sup>1</sup> \* Ni'a yavonemi tuta vetoina ena wai sabi vayausimi. 'Idewani Buki Nugwenugweina simana vonaya, "Eguma taha toga nuanuana

---

\* **12:21:** 2Kol 13:2      \* **13:1:** Luve 19:15; Md 18:16; 1Tim 5:19

mali tomotau natauyea toluvine matadia taha luveifana weaqina, e 'inega luaqiaqiea be wese luveifa nana ana to'ita adi yau magilafudi nage toidi na'ewedi, ta edi simana 'ifoqe 'inega tomotau nana luvine nalobea.”

<sup>2</sup> Lova egu vayausa vemagilafuna 'inaya ilivu luveifana ana toviaqayavo vona waiwaina ni'a yaneidi. Ta wese ba'itagana toluveifadi be tomotau qabudi egu vona waiwaina yalulu'eviviea 'idia: Ba'e egu vayausa vetoina 'inaya ge wese ena nuakokoloyedi, ta 'esi luvematasabu ina lobea.

<sup>3</sup> Omi'a nuanuami ona alamani aqiaqiea 'eguma Keliso veveqae ya'a 'iguyega. Ta yavona aqi-aqiemi, vayausa nana 'inaya egu viaqayavo ona 'itedi, ta 'idiega ona alamania ya'a Keliso ena tovona. Ta wese Keliso nana ge dawalilina emi vi-aqa luveifadi weaqidi, ta 'esi 'iguyega ena waiwai nave'itemi sabi givetunuqimi.

<sup>4</sup> \* Vonahaqiaqi, lova Keliso me ena dawalili 'aliga 'etoluai 'inaya, ta ba'itagana Yaubada ena waiwaiega mayawaina toatoa. Ima'a ni'a ave'aidega Keliso maega, 'inega wese dawalilima, ta tauna maega atoatoa 'inega Yaubada ena waiwai ni'a a'ewea, ta ba'e waiwai nana ana vefewea ami givetunuqa weaqina.

<sup>5</sup> \* Taumiega luaqiaqiemi be ona 'ita aqiaqiemi 'eguma ovetumaqana aqiaqi Keliso 'inaya, nage gebu. Ta 'eguma ge ami fata ona vonaya, “Iesu Keliso ita'a maega!” e 'inega ge wese me emi vetumaqana aqiaqi Keliso 'inaya.

<sup>6</sup> Ta nuanuagu ona alamani aqiaqiea ima'a

---

\* 13:4: Fil 2:7-8      \* 13:5: 1Kol 11:28



taumega ni'a a'ita aqiaqiema ema vetumaqana weaqina, ta Yaubada vetumaqana nana ni'a alamaniania 'inega 'awahaqiaqiema Keliso ena tofe-wayavo.

<sup>7</sup> Ima'a avevenoqi Yaubada 'inaya weaqimi be ge taha luveifana ona viaqi. Ta ba'e venoqi nana ge ada 'inanea sabi ve'ita 'ifoqeyema vonigo ima'a ema fewa nuanimia aqiaqi otaqina Yaubada matanaya. Nage ana 'ita kavona ima'a fewa ge aqiaqina ada viaqia nuanimia, ta 'esi ba'e 'idewani avevenoqi 'aiqa weaqimi, mana nuanuama viaqa aqiaqidi ona viaqidi.

<sup>8</sup> Ima'a tovaletuyana ge ama luaqiaqi be ema waiwai ana a'uya Yaubada ena vonahaqiaqi adi 'etoboda weaqina, ta 'esi luaqiaqiema be tuta qabuna vona diavona ana simasimamedi be yaqisa tomotau ina noqolidi.

<sup>9</sup> Ge taha tola'ai 'eguma ima'a dawalilima, ta 'esi yani qiduana 'imaya 'eguma omi'a ona vewaiwai. 'Inega avevenoqi weaqimi Yaubada 'inaya be omi'a ona veilivu aqiaqi.

<sup>10</sup> \* 'Abiboda be ena wai, ta nugweta leta ba'e 'inega yalulugaihimi, mana wai nana 'inaya ge nu-anuagu vona waiwaina 'inega ena lugwaeyemi. Lova eda Kaiwabu 'abiluvine neigu, ta egu wai 'inaya nu-anuagu 'abiluvine nana 'inega ena give-waiwaiemi, ta ge nu-anuagu 'abiluvine nana 'inega emi vetumaqana ena qeuni.

*Faulo ena lukafoi 'ekalesia 'idia*

<sup>11</sup> Egwavo, egu vona ana 'ebeluo'ova ba'e: Nu-anuagu qiduana me emi qaiawa ona toatoa. Emi

---

\* **13:10:** 2Kol 10:8

ilivu luviefadi ona nogedi ta ona veilivu aqiaqi. Ma emiavo vona 'inega ona veiuiula. Ta wese nu-adaumwalega ona toa 'aideganaya. Ta ba'e 'inega veyoluba be daumwala ana Yaubada nuanimia natoatoa.

<sup>12</sup> Omi'a 'ekalesia ma emiavo ona lukaiwa venima sibusu 'inega ita'a eda ilivu 'inega. Tovetu-maqana qabudi ba'idia itoatoa wese edi lukaiwa 'imia.

<sup>13</sup> Yavevenoqi weaqimi be eda Kaiwabu Ieisu Keliso ena nuakolokolo be, Yaubada ena veyoluba ta wese Niboana Gwalagwalana ena veiaiana omi'a qabumi ona lutonovia.

**Molima New Testament**  
**The New Testament in the Molima Language of Papua**  
**New Guinea**

**Nupela Testamen long tokples Molima long Niugini**

copyright © 2010 Folk&Språk and Swedish Mission Alliance

© 2010 Folk&Språk and Swedish Mission Alliance

Language: Molima

Translation by: Folk&Språk

Contributor: The Molima Translation Committee

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

---

PDF generated using Haiola and XeLaTeX on 18 Mar 2025 from source files dated 9 Oct 2020

fa4298de-51e6-508c-88a7-73c29a6d8004